

Dä Maa

Waß nië wie öft ich scho 'in Maa nougfohn bin
Vo' Lechtfels nouch Bambarch
Hou a Raachbië gsuffn im Schlenkerla
Bin weidegewörcht nouch Wözborch
Wu ich gebohrn won bin am Lusamgärtla.
Bin mid dä Fähn vo' Volkach nübe
Nouch Escherndorf, hou a Schöppla getrukn
Aufdä Voglsborch -
Dou duntn souchn sa "Mee" - nië "Maa" wie im Franknwald
Ouwe es kummt auf aans raus:
Me sen ölla Frankn
Obbme Flüëße vo' Kronich sen, Fischer vo' Hetzfeld,
Korbmake vo' Waasmaa,
Huëlmache vo' Öjbe-, Winze vo' Unnefrankn.

Waß nië wie öft ich mid dä Eiseboo
Nouch Frankfodd bin, übe Aschaberch
Ümme 'in Maa nouch -
Ümme hou ich mich auf die Seitn gsetzt
Wu me 'in Fluuß säh koo,
Die Maaküh, die Ausfluchsdampfe,
Die Angle un' ölla wu am Fluuß arwedn -
Blüëß die Flüëße sen nümme doua.
Hou zum Stafflberch geguckt, kan Eremit me gsähn,
Kanna veza Heilichn,
Ouwe Franne, die wu bei Bambarch Gemüs ghackt ham,
Hintern Wözborsche Bahnhuëf, aufn Staawaapfad
Traubn nougetrouchn ham im Harbest.

Waß nië wie öft ich auf dä Aldn Maabrück
Gstanna bin, in Wözborch,
Nein Maa gschpezt hou, Staa neigewöffft -
Wie öft ich 'in Kilian aageglotzt hou,
'in Kolonat, 'in Totnan,
Die goldna Stern ümm'in Kuëpf vo' dä Madonna -
Un' weide nauf geguckt zum Käppela
Zur Festing un' zum Frankntorm -
Wie öft ich vo' Banz 'in Maa nougeguckt hou
Öbbme Seehof sicht, odde Pommersfelden
Odde goo Wözborch

Forts: